

Pronto lo tin un Catalog di Pintura di Indian riba Baranca



ORANJESTAD (AAN) -- Despues di algun decada di trabou, un catalog cu ta contene e imagennan di mas di 400 pintura, riba baranca na Aruba, lo wordo publica e aña nobo aki.

Fundacion 1403 a guia e financiamiento y e produccion di e buki aki cual lo ta e di 16 den e serie di publicacionnan di Museo Arkeologico Nacional Aruba (MANA).

E pinturanan Indian riba baranca, ta un parti importante di nos herencia cultural y un fuente di inspiracion pa artista y otro mentenan creativo den nos comunidad. E catalog lo duna publico general y e comunidad cientifico un bista di e rikeza di e herencia aki, na mes momento cu e ta fungi como un instrumento pa nan conservacion y preservacion. E catalog ta un reki-

sito importante tambe den e proceso pa yega na un nominacion riba e lista di herencia mundial di UNESCO.

Banda di su formato y contenido atractivo, e publicacion di un manera innovativo ta presenta e puntanan di bista diferente di e dos autornan, e arkeologonan dr. Aad Versteeg y drs. Harold Kelly. E arkeologo di MANA Harold Kelly a acepta e reto di ta parti di



e publicacion cu a ser inicia pa dr. Versteeg, kende ta hopi conoci na Aruba pa su trabonan di investigacion arkeologico den colaboracion cu MANA na, entre otro, Malmok y Tanki Flip. E perspectiva cientifico di drs. Kelly ta diferencia di esun di su colega, dunando e publicacion un angulo dinamico y sosteniendo e pensamiento cu mester pone prioridad pa promove mas investigacion cientifico di nos herencia arkeologico.

Prins Bernhard Cultuur-

fonds Caribisch Gebied y UNOCA a financia gran parti di e publicacion, sigurando asina cu nos comunidad y bishitantenan por conoce e rikeza arkeologico di nos isla. Fundacion 1403 ta masha agradecido tambe na Vertegenwoordiging van Nederland in Oranjestad, Gomez Coffie y FCCA cualnan a duna un aporte.

Esnan interesa pa haya sa mas di e publicacion aki por bishita e pagina di Facebook di Fundacion 1403.